

# Powšitkowne WOZJEWJENJA

njedźelu, 7. junija 2020

## Wusyłanja Božich službow live

W Kulowje nětko tola dlěje hač jeničce do swjatow Bože služby přez livestream wusyłaja. Serbskorěčne kemše tutu njedźelu Swjateje Trojicy, 7. junija, móža wěriwi znowa w internete scěhować. Dupołdnja we 8.30 hodź. přenjesu so kemše z Kulowskeje cyrkwyje runje tak kaž na swjedženju Božeho ćěla, štwórtk, 11. junija, we 8.30 hodź., na kotrymž w 14 hodź. tež nyšpor wusyłaja. Njedźelu, 14. junija, přenjesu z Kulowa jeničce nyšpor w 14 hodź., dokelž su kemše dupołdnja na sportnišću.

Z Ralbic wusyła so Boža mša tohorunja tutu njedźelu, dale na swjedženju Božeho ćěla kaž tež přichodnu njedźelu stajnje we 8.30 hodź. přez livestream, ale jeničce za słuchanje. Linki ke wšěm wusyłanjam su stajnje aktualnje pod [www.posol.de](http://www.posol.de) podate.

## Dźělowe městno pola Katolskeho Posoła

Towarstwo Cyrila a Metoda z.t. pyta wot 1. decembra wosobu, kotraž by redakciski team zesylniła. Dotalna sobudźelačerka poda so kónc nowembra na wuměnk. Wuměnjnja za přistajenje su nimo wuznača k wěrje a wučbje romsko-katolskeje cyrkwyje wotzamknjene powołanske wukubłanje, jara dobre znajomosće serbskeje rěče, stawiznow a kultury, po móžnosći znajomosće rěče, stawiznow a kultury druhich słowjanskich krajow, znajomosće na polu žurnalizma, sadžby (Adobe InDesign), we wobdźělanju wobrazow (Adobe Photoshop) kaž tež zakładne znajomosće na polu katolskeje nabožiny respektiwne zwólniwosć, sej to w krótkim času přiswojić. Wukonjeć maja so tohorunja z pomocu kompjuterowych programow zarjadniske nadawki. Mzda płaći so po tarifowym zrěčenju za zjawnostnu službu (TVöD). Zajimcy měli so hač do wutory, 30. junija, pola Towarstwa Cyrila a Metoda z.t., Póstowe naměsto 2, 02625 Budyšin, abo na mailowu adresu [TCM@Posol.de](mailto:TCM@Posol.de) pisomnje wo městno požadać. Tam zhonja nadrobnosće.

## Serbske kemše w Drježdžanach

Drježdžanscy Serbja su na maćernorěčnu Božu mšu njedźelu, 28. junija, w 16 hodź. do cyrkwyje swjateho Antonija w Drježdžanach-Löbtauwje, Bünauska hasa 10, přeprošeni. Kemše změje farar Gabriš Nawka. Zetkanje w tamnišej wosadnicy zakonskich postajenjow koronoweje pandemije dla njebudže.

## Wulět samostejacych lětsa njebudže

Planowany wulět samostejacych ze serbskich wosadow z busom njemóže so bohužel přewjesć. Předpisy corony dla to znjemóžnjeja. Nadźijam pak so, zo móžemy so w sep-tembru zaso w Smochčanskim Domje biskopa Bena zetkać. To pak wotwisuje hišće wot zakonskich postajenjow korony dla, kotrež potom płaća. *Monika Kralowa*

## Nyšpor z hudźbu w Budyšinje

Do Budyskeje tachantskeje cyrkwyje su wěriwi tutu njedźelu Swjateje Trojicy, 7. junija, we 18 hodź. na hudźbny nyšpor přeprošeni. Jón wuhotuja Sabine Kowollik (sopran a flejta) kaž tež dujerjo skupiny Musica Con Spirito z Drježdžan.

## **Smochčanski forum digitalnje**

„Normalita? Što ma nam koronowa kriza prajić?“ rěka tema Smochčanskeho foruma, kotryž poskičuje Dom biskopa Bena póndzelu, 15. junija, w 19.30 hodź. přeni raz digitalnje. Přednošk změje filozof dr. Christoph Quarch. Wobsahowje steja pozadki a wuskutki koronoweje krizy w srjedźišću. Přednošk a naslědna rozmołwa wotmětej so digitalnje přez widejowu konferencu. Nawjedować budže ju Ansgar Hoffmann, kubłanski referent Domu biskopa Bena. Štóz chce so na forumje wobdźělic, dyrbi so w Smochčicach přizjewić. Zdobom trjebaja wobdźělnicy k tomu kompjuter, tablet abo smartphone. Po přizjewjenju z mailku pod referent@benno-haus.de abo pod telefonowym čisłom (03 59 35) 2 23 17 dóstanu trěbne daty z mailku.

## **Nowe kontaktowe daty**

Biskopski ordinariat a Dom katedrale ze zarjadnistwom biskopa w Drježdžanach budžetej wot srjedź junija pod nowym čisłom (03 51) 31 56 30 docpějomej. Tež mailowe adresy sobudźělačerjow zarjadnistwa Drježdžansko-Mišnjanskeho biskopstwa so změnja. Kóždy z nich je pod swojej wosobinskej adresu předmjeno.mjeno@bddmei.de docpějomej.

## **Wustajeńca wo jutrach w Serbach**

Nałožki, kotrež so wokoło jutrow w Hornjej a Delnej Łužicy, w katolskich kaž tež ewangelskich kónčinach pěstuja, předstaja wustajeńca „Jutry w Serbach“ w Budyskim Serbskim muzeju. Ju wobohaćeja twórby serbskeho wumělca Marija Ošiki, na přikład „Křižowy puć“. Wosebita wustajeńca wostanje hač do 23. awgusta přistupna.